

# **OSEAS-GARDA**

## **OSEAS**

### **GEBE-SOGLENAID**

#### **Garda-nug**

*Oseas-Garda.* Oseas, Bab-gayaburbagi sunmakdii gusad. *Abonolegedye,* Oseas-nug obarileged.

#### **Oseas-Gardagi weyob sunmaklenaid**

Oseas Israel-yarginedid, Judá-yarginedsulid. Unnila Israel-yargungi Bab-Gayaburba-barsogdii gusad.

Binsaleded, we-garda (Cristo-idu) birga 750'sik, degi, 730'sik narmaklesye. We-ibagagine, we-reymar Judá-reyga maigusmalad: Uzías, Jotam, Acaz, degi, Ezequías. Degine, Israel-yalagindi, Joás-machi-Jeroboam reyga maigusad.

Oseas, Bab-Dummad-dulemar-sabedi magar itosad. Oseas, Bab-Dummad-ega-sogsadba ome-gambasaed nikusad. Oseas, e-ome gambasaega egi-wakitele, na e-ome-abegedba gannar aminaddaed. Deyobi, Bab-Dummad dule-egi-bangudele, dule-amididaed. E-dulamar egi bangubisuli abedaed. Oseas, Israel-dulemarga sabedba Bab-Dummad-gayaburbagi sunmaksad, adi, Israel-dulemar melle Bab-Dummadgi bangumalagar, unnila Bab-Dummadbarbi nanadii gumalagar.

We-gardagine, weyob ilemakar sunmaklenaid:

1. Bab-Dummad, Oseas-ome-nikusadba, burbar Israel-dulemargi sunmaknaid (1:1—3:5).
2. Bab-Dummad Israel-dulemargi sunmaked (4:1—14:9).
  - 2a. Israel-dulemar-nue-isgusmalad (4:1—5:15).
  - 2b. Israel-dulemar-sabsur-odurdaklegoed (6:1—10:15).
  - 2c. Bab-Dummad Israel-dulemar-sabesailad (11:1—14:9).

Be itogua.

---

**1. BAB-DUMMAD, OSEAS-OME-NIKUSADBA,  
BURBAR ISRAEL-DULEMARGI SUNMAKNAID  
(1:1—3:5)**

**Oseas ome-gambasaed nikusad**

**1** <sup>1</sup>Deunni, Judá-dulemar-e-reymar Uzías, Jotam, Acaz, degi, Ezequías, negsemamaigusad-ibagagine, degi, Israel-dulemar-e-rey Joás-machi-Jeroboam neg-semaigusmogad-ibagagine, Bab-Jehová weyob Beeri-machi-Oseas'ga sunmaknonikid.

<sup>2</sup>Gebedgi, Bab-Jehová weyob Oseas'ga sunmaksad. Weyob ega sogsad: “Be nao, ome-gambasaed be nikuna, ebo be anagan-nikuo. Ar Israel-dulemar bela nue-isgusbukwad, ar bela angi bangudmalad.”

<sup>3</sup>Degine, geb Oseas Bab-Dummad-sogedba imaksad. Agi, Oseas Diblaim-e-sisgwā Gomer'ye-nugad nikunonikid. Degiidbali, Gomer gurgin-nika gunonikid, geb ega susugwa uklenonikid.

<sup>4</sup>Geb degine, Bab-Jehová Oseas'ga sogded: “We-susugwa Jezreel'ye be onug-imako. Ar ade, emisgwasaale, an Jehú-e-gwenadgan sabsurwiogoed. Ar Jehú'de Jezreel-nebagi dulemar-ogilos gusad. Deyob an Israel-yar-selemaid ilagwen-obelogar imakoed. <sup>5</sup>We-ibagagine, Jezreel-nebagi Israel-dulemar-e-bila-onomalad-e-gargangued an obelogoed.”

<sup>6</sup>Geb ibagan-nasadgi, Gomer gurgin-nika gunonibalid, geb ega bunolo uklenonikid. Degine, geb Bab-Jehová Oseas'ga sogded: “We-goe Lo-Ruhama'ye be onugsao. A-sogleged, ‘wiledaklegarsulidye.’ Ar ade, bar an Israel-dulemar wiledakosulid, ar e-isgusmalad an ega eliosulid. <sup>7</sup>Unnila Judá-dulemarginbi an ise-wile binsaoed, a-dulemardi an bendakoed. Bila-onogedgi Judá-dulemar-bendakegala, warsi an abesulid, es-suid an abesurbalid, molimar an abesurbalid, dule-moligi-sii-urwemalad an abesurbalid. Ar anbi walagwen unni gued. Ar ani an e-Bab-Dummad gued, ani an bendakoed.”

<sup>8</sup>Lo-Ruhama mam-iargusgu, Gomer, gannar gurgin-nika gunonibalid, geb gannar ega susugwa-uklenonikid. <sup>9</sup>Agine, Bab-Jehová Oseas'ga sogded: “Lo-Ammi'ye be onug-imako. A-sogleged, ‘an-dulamarsulidye.’ Ar bemar bar an-dulasurmalad, degine, bar an be-Bab-Dummadsurmogad.

<sup>10</sup>“Ar ibagwengine, Israel-dulemar ukub-mergedyob dule-bukib-gunonimaloed. Dogdar-mergedba geg wilubsalege, geg ebislege gunonimaloed. Bia e-annik soglesa, ‘an-neggwebursulidye,’ agine, ‘Bab-Dummad-Dula-Maid-e-mimmiganye’ bilenonikoed. <sup>11</sup>Judá-dulemar, Israel-dulemarbo ambikunonimaloed, agi, e-iduedga dule-gwensak onugsanonicaloed. Gannar dule-soggwennayob e-yargi ambikudmaload. Ar Jezreel'ga iba-dummad nagunonikoed.”

**Bab-Jehová e-dulamar-isgus-bukwadgi e-sabgued oyonaid**

**2**

<sup>1</sup> Bab-Jehová soged:

“AGINE BE-GWENADGANSE, ‘BAB-DUMMAD-DULAMARYE’ BE GORMALOED.

BE-BUNMARED, ‘WILEDAKLEGARMALADYE’ BE GORMARBALOED.

<sup>2</sup> ”BE-NAN ABARGI-ODELEGEWA BE IMAKMAR, EGI BE YOLEMAR.

AR WE-OOME, BAR AN-OMESULID,  
BAR AN E-SUISURMOGAD.

MELLE GAMBA SAMALAD-DAMALADYOB BAR SAN-IMAKE,  
MACHERGAN-EGI-WERGUED OBELOGE.

<sup>3</sup> AR DEYOB IMAKSULILE, IGI-GWALULESAD-IBAGI AIDENONIGUSADYABI AN IMAKOED.

UKA-SWILI AN IMAKOED.

NEGA-DULESULIDGANGA AN IMAKOED.

NAPA-DINNAREGEDGA AN SAOED,  
UKU-UKU-ITOGEDBA-BURGWEGA AN IMAKOED.

<sup>4</sup> AN E-MIMMIGAN WILE DAKOSULID,  
ADE, GAMBASAED-MIMMIGANAD.

<sup>5</sup> E-NANDE, GAMBASAEDID.

AR WE-OOME-MIMMIGAN-BAKSADDE BINGEDSULIDAEDID.

AR ADE, WE-OOME WEYOB SOGSAD:

‘AN-SUIGANMARBA AN NABIE,  
AMAR ANGA MASGUNNED UKDAED,  
AMAR ANGA GOBED UKMARBALID,  
AMAR ANGA MOR-WAWAAD, DEGI, LINO-DUBGI-MOR-SOBALD  
UKDAMARBALID,  
AMAR ANGA OLIVO-GWALLU, DEGINE, GOBED-NUEGAN  
UKDAMARBALID.’

<sup>6</sup> A-ULALE, ANI AN BAB-DUMMAD, AN E-IDUAR IGAR OMUROED,  
E-IDUAR IKOMAR-MIE-MIE AN SAOED,  
ADI, DEGIDBALI, BAR IGAR AMIOSULID.

<sup>7</sup> AR E-SUIGANBINA SURBINSA MIAMAKDII GUOED.

Gwen amisulidbali weyob sogdoed:

‘BUR AN-SUI-SAILAGINEDSE AN GANNAR NAOE,  
IDUARDI BUR AN NUED GUDIINAD.’

<sup>8</sup> AR WE-OOME ANI AN EGA MASGUNNED-UKEDYE BINSASSULID,  
ANI AN EGA VINO-BINIGAN-UKEDYE BINSASSULID,  
DEGI, OLIVO-GWALLUMAR-UKEDYE, GWEEN BINSASSULID.

AR ANI AN EGA MANIMAR, OLOMAR AN EGA OMELOSAD.

Degite, ¿IGI-WEDE WE-IBMAR MAR IMAKSASUNNA?

¡AKA BAAL-BAB-DUMMAD YOB-IMAKLEMALAD EGI SOBSAD!

- 9 "A-ulale, ibagan-omosadgi, e-annik gannar an bela an-ibmar-gwagmar-ega-uksad,  
 an-vino-nuegan-ega-uksad an suoed.  
 Mor-wawaad an ega yoega-uksad,  
 degi, lino-dubgi-mor-sobarmalad an ega-uksad,  
 bela gannar an ei sunonikoed.
- 10 E-suigan-asabinni obingegsaegala, uka-swana an ogwisguoed.  
 We-ibmargi gwen wakinnosulid, ar guedsegad.
- 11 E-wergudiid bela an ei obelogoed:  
 E-ibamar-onoged, e-nii-binigangi ibamar-onoged,  
 degi, e-obunnoged-ibamar, e-itoakwaa-ibamar-onogedgi ibamar-onoged,  
 e-ibe bela an obelogoed.
- 12 E-uva-nainumar an ei bela maada imakoed,  
 higuera-sapimar an ei bela obelogoed.  
 Ar 'we-ibmar an-suigan anga uksaye' gordiid. Sapurbi-moodo nai an imakoed,  
 ibmar-durgan-sapurbarmalad bela e-ibmar-naid ei gunmalaga an imakoed.
- 13 An we-ome sabsur-odurdakoed,  
 ar bab-dummadyob-imaklemaladga ina-wawagan-oburmakdii gusad.  
 E-suiganba-naega olargan biiri yodii gusad,  
 ordubmar ena nasikdii gusad,  
 ar gwen angi binsassulid,  
 agala, an sabsur-odurdakoed.  
 Ani an Bab-Jehová-guedi we-ibmar soged.
- 14 "Anbina-sogega an imakoed:  
 Nega-dulesulidganba an sedoed,  
 ega sabedgi nuekwaan sunmakoed.
- 15 Agi, Acor-nebagi, uva-nainumar gannar an ega obiroed,  
 sabsur-odurdakleged-neba an ega weligued-nebaga imakoed.  
 A-nebagine igi-nuchukwa-unni angadga gusa,  
 degi, igi-Egipto-yargi-noargusgu angadga an imaksa,  
 deyob an gannar imakoed."
- 16 Bab-Jehová weyob soged:  
 "A-ibagagine, 'an-dummadye' be anse golosulid.  
 'An-suiye' be anse goloed.
- 17 Be-bab-dummadyob-imaklemalad-e-nug-biega  
 bar an be-imakosulid,  
 degi, bipisaale bar ese be gorsii guosulid.

- 18** A-ibagine, we-ibmar-durgan mer bese achamalaga an imakoed:  
 Ibmar-durgan-sapurbarmalad, mulamar, ibmar-durgan-unimalad.  
 Deginbali, we-yargine, warsigi-urweleged an obelobaloed,  
 es-suidmargi-urweleged, bila-onolemaladi an obelobaloed,  
 adi, bela na dobedsuli gabdii gumalagar.
- 19** An-omega degisadegu an be-imakoed,  
 igar-soglemaidba an-ome-sunnadga an be-imakoed.  
 Ar an bela-bela be-sabsoggu, deyob an be-imakoed.
- 20** An be-nikuued, an be-dikarba noosulid.  
 Degidbali, magar be an-daknonikoed, ani an Bab-Jehová gue.”
- 21** Bab-Jehová soged:  
 “A-ibagine, mogirmar dii-wiega an imakoed,  
 geb abali, napaneg ibmar-gwag-oniega an imakoed.
- 22** Degidbali, trigo’mar ainidagoed,  
 vino-binid bukidar ainidagoed,  
 olivo-gwallumar obinebakaoed.  
 Bela we-ibmarmala, an Jezreel-neba-onasguega imakoed.
- 23** An-dulamarga napaneg an uknonikoed,  
 angadgarbi an-dulamar an imakoed.  
 ‘Wiledaklegarsurmataladi’ an wiledaknonikoed  
 ‘An-dulasurmaladse, an-dulamarye,’ an gornonikoed  
 ‘An-Bab-Dummadye,’ anse gormarmogoed.”

### Oseas, gannar e-ome-mononikid

**3** <sup>1</sup>Bab-Jehová gannar anga sogdebalid: “Be nae, we-ome-negsichigi-galagwensuli-nanaedse be monae, ar ade, dule-baid-e-ai-nuedga gudiid. Igi an Israel-dulemar-sabe, deyob be sabguo. Ar Israel-dulemar amba bab-dummadyob-imaklemaladba nanamar-inigwele, degi, uva-madu-olo bab-dummadyob-imaklemaladga-uklemalad gundimar-inigwele, amba an wile daked.”

<sup>2</sup>Degisoggu, mani-sibugan-gwaambe-gakatar (15) an-ome-e-ai-nuedga-gudiid an bennuksad, degi, orosgsaar-dakleged-cebada’ye-nugad galón-gwadulabake-gakabo (82) an ega uksabalid. <sup>3</sup>Geb an-omega an sogsad: “Be anbo iba-undar-nanadii guo. Galagwensuli bar be nanaosur. Bar bipisaale be machered-baidbo negsichigi nanaosur. ¡Anbela an ome-baidse achaosulid!”

<sup>4</sup>Ar Israel-dulemar undar reysuli, degi, dule-negseedsuli gudii gumaloed. Dagine, bar ibmar-ogumakar-ukleged-ailagi ibmar-ukdii guosurmalad, degi, dule-irwa-Bab-Dummadse-goled-mor-yoi guosurmalad, degine, ibmar-wagar-wilubganmar-sedii guosurmarbalid.

<sup>5</sup>Geb sorbali, Israel-dulemar gannar na e-Bab-Dummad-Jehová amidmaloed, degi, e-rey-David amidmaloed. Ibagan-bergued-mosale, Bab-Jehová-dobekwaa gunonimaloed, degi, Bab-Dummad-e-nuedbinsaed-egisnai gunonimaloed.

**2. BAB-DUMMAD ISRAEL-DULEMARGI SUNMAKED  
(4:1—14:9)**

**2a. Israel-dulemar-nue-isgusmalad  
(4:1—5:15)**

**Bab-Jehová Israel-dulemarse urwenaid**

**4** 1 Israel-dulemar, Bab-Jehová-gayaburba be nue itomar,  
Bab-Jehová dulamar-bukwadga igar-nabogesokalid.

Bab-Dummad weyob soged:

“Ar an-dulamar-abargine, dule-innikidaed bergusad,  
emar-sabgued bergusbalid,  
an-igar-amimalad bergusbalid.

2 Aka bur we-ibmarmar burgusad:

Gakangi yamo-ise-sogar-sogleged,  
gakansaed, atursaed,  
negrichigi-abirgunagwarsuli-nanaed, dule-gindakmalad.  
¡Dulemar gindaklemamaigus nanaed!

3 A-ulale, yar-naidgi wile-itoleged-dummad nagunonikoed,  
egi-dulemar-gudidiidi niga-galakudmaloed.

Sapurgi ibmar-durgan-bukwamaladi, bela burgwidmaloed,  
nuumala, uamarse-bakale, bela girkudoed.

4 ”Melle bemar dule-bamaladgi na be gwisgumalo,  
melle be dule-bamaladse urwemarbalo.

An-urwenaidi, unnila dule-irwa-anse-goledgi an urwenaid.

5 Ar bemala ibginedbali, degi, mutikidbali, oitolenonimamotoed.

Bemarbali dule-an-gayaburba-barsoged ibitononimarmogoed.

¡Be-nan an be-ibe obelogoed!

6 Ar an-dulamar aku an-daksamaladbali bela burgwismalad.

”Ar be aku an-daksamarsoggu,  
dule-irwa-anse-goled-igargi an be-obanmarmosunnad.

Ar be an-igar-mamaid be obachasoggua,  
be-wagan-danimaloed an iemosunnoed.

7 Ar dule-irwa-anse-gormalad-mergedbali, aka bur bule angi yoled-nanaed.

Degisoggu, an e-nug-odummoged-anar, anse wilemaloed.

8 An-neggwebur-e-isguedgi mas gundimalad,  
aga bur gatik an-neggwebur-isgued abemalad.

9 Degi-inigwele, dule-irwa-anse-gormalad sabsur-anse  
odurdaklemaloed,  
degene, dulamar e-damaladba sabsur-anse odurdaklebaloed.

10 "Bab-Jehová'gi bangusmalad.

Agala, aisaar mas-gunmalo-inigwele, gwen immelegosurmalad.  
Deginé, negsichigi-galagwensur-nanamalo-inigwele,  
gwen dula-omelogosurmalad.

11 "Vino'gi mumgudimaladbali, gambasamaladbali,  
oes guditimalad, bar itodisurmalad.

12 An-neggwebur-dulamar suar-nuchuse idakmalad,  
a-suar ega ibmar sogdaed.

Galagwensur-negsichigi-nanamaladbali aku-neg-itoge gudmalad.  
Negsichigi-galagwensur angi-yolegar nanadimalad.

13 Yar-birigangine, yar-mullugangine, sapimar-urba e-bab-dummaganga  
ina-wawad oburmakdamalad,  
degi, ibmar-ogumakar ukdamarbalid.

A-ulale, e-bunamala, galagwensuli negsichigi-nanaddamalad,  
degi, e-balamar abirgunagwarsuli negsichigi yoleddamalad.

14 Be-bunamala galagwensuli negsichigi-nanadimalad-ular,  
be-balamar abirgunagwarsuli negsichigi-yoledimalad-ular, an  
sabsur-odurdakosulid.

Ar ade, e-suimarmoga gambasamaladba nanadimarmogad,  
degi, bab-dummagan-neggi-gambasamaladbo ibmar-ogumakar  
ukmarbalid.

Degisoggu, neggwebur aku-neg-itogedbali,  
bela bergudoed.

15 "Ar Israel-dulemar galagwensuli negsichidgi nanadimalad,  
Judá-dulemar, bemardi mer be deyob damarmogad.

"Judá-dulemar, melle Gilgal'ye-neg-nugadse be namalo,  
melle be Bet-Avén'ye-negye-nugadse be namalo.

Melle be 'Bab-Jehová-nuggi' ise-sogar-imakmalo.

16 Ar Israel-dulemar moli-bebe-nikad-bunolo-uayasulidyob guded.

Degisoggu, ar igi sibad-wawaad-sapingana nainu-olloledgi gagangi  
omalenaidae,  
¿ar Bab-Jehová, deyob Israel-dulemar-imakoe?  
Bar deyob imakosulid.

17 Efraín-dulemar bab-dummadyob-imaklemaladgi alakwaa seledimalad.  
Mer ese bar gormar, ar na deyob nanabimarye soged.

18 Ar Efraín-dulemar sisa-gobed ei bergudele, gambasaedgine  
burguddamalad.

Ar e-dummagan-yar-semaladbela, igar-isgana-imakedbina sogdamalad,

19 A-ulale, e-bab-dummaganga ibmar-ogumakar-ukmalad-ular,  
bingegunanai gudmaloed,  
burwa-ooregedbali bela bergumaloed."

### Bab-Dummad Israel-dulemargi gwisgunaid

**5** Bab-Jehová soged:

1 “¡Dule-irwa-anse-gormalad, nue be an-itomalo!

    ¡Israel-e-dulemar, nue be bogi an-itomalo!

¡Reyneg-yaginmalad, nue be an-itomalo!

    ¡An bemargi yolesokalid!

Bemar Mizpa'ye-neg-nugadgi an-neggwebur-yardaklegega  
imaksamalad,

Bemar Tabor-yalagi an-dulamar-yardaklegega imaksamarbalid.

2 Bemar Sitim-nebagi dia-yaa-matusulidyobi an-neggweburga  
gusmalad.

    A-ulale, an sabsur-bemar-odurdakoed.

3 An wisid, Efraín-dulemar igi-damala,

    an Israel-dulemar-daed ise-wisimakarbalid.

Emide, Efraín-dulemar galagwensuli-negsichigi nanadmalad.

    Israel-dulemar bela isgudmalad.

4 ”Na ibmar-isgana-imakmaladbali, geg anse gannar-dagega gumalad.

    Ar galagwensuli negsichigi-nanaedi, an-geg-magar-dake e-imaked.

5 Israel-dulemar na e-san-dummarba-imakdimaladi,

    na dukin-egi-yolegega imakoed.

Ar Israel-dulemar, Efraín-dulemar, na e-isguedgine dukin  
yolemaloed.

    Judá-dulemarse-bela deyob eba gumarmogoed.

6 E-sibad-wawaadyalaba, e-molimaryalaba, an-amidii gumaloenad,  
degi-inigwele, gwen an-amiosurmalad.

    ¡Ar an e-idu bangudoed!

7 Ar angi bela dodosmalad.

    Bab-baigangad mimmi nikusmalad.

Degisoggu, bemala, be-nainumala,  
    niigwengi ilagwen-berguar guoed.”

Bab-Jehová soged:

8 “Gabaa-neggweburgi moli-bebe-gar be ogormar,

    Ramá-neggweburgi gar-trompeta be ogormar.

Bet-Avén-neggweburgi binnasuli be

bila-onogedgi-gormakedyobi be gormakmar:

‘Benjamín-neggwebur, nue-salakar.’

9 Israel-dulemar, innikii an bemarga soged,

    ibmar-guoedi an oyogoed.

Ar Efraín-neggwebur sabsur-odurdakleged-ibagi

    bela olloo melledoed.

10 Judá-dulemar-e-dummagana, dule-nainu-odogedyob gued.

    Degisoggu, an-urwedi, dii-dummad-noedyobi an emargi onogoed.

- 11 Efraín-dulemar mesagwar imakledisunnad,  
     e-igar-nabolemaladgi egi gwisguledisunnad,  
     ar ade, bab-dummadyob-imaklemaladba bur nanaed abemalad.
- 12 Degisoggu, an Efraín-dulemarga samuyob an guoed.  
     Deginbali, Judá-dulemarga sibebyob an guoed.
- 13 "Efraín-neggwebur, na e-boni-nika dakargua,  
     Judá-neggwebur, e-boni-yaamar dakarmogua,  
     Asiria-yalase abarmakdemaloenad,  
     Asiria-e-reyse bendakleged aminamaloenad.  
     Deger-inigwele, Asiria-e-rey gwen e-bendakosulid,  
     degi, gwen Judá-neggweburga boni-yaamar nudakosurbalid.
- 14 An Efraín-neggweburgala, achumigur-nono-wawaadyobi an guoed,  
     Judá-neggweburgala, achumigur-nono-wawaad-senigwadyobi an guoed.  
     An-sunnagwad an gaoed, geb an saga-saga imakoed,  
     dule-wargwensaale, gwen bendaknonikosulid.
- 15 Agine geb an gannar an-maidse nonikoed.  
     Na magar e-isgusad-itononimaladse an indakoed.  
     Na magar e-isgusad-itononimalale, degine, angi-yolesmalad na  
     magar-itononimalale, suli-suli itodmaloed.  
     Degibali, geb bela-belad an-amidii gumaloed."

## 2b. Israel-dulemar-sabsur-odurdaklegoed (6:1—10:15)

### Israel-dulemar Bab-Dummadse-gannar-dagedgi sunmaked

- 6** 1 Israel-dulemar sogdemalad:  
     "Dagmar, gannar anmar Bab-Jehová'se namalo.  
     Bab-Dummad an-ichimaksa-inigwele, amba anmar-nudakoed.  
     Anmar-onaglik-imaksad-inigwele, anmar-nudakoed.
- 2 Ibabogwad-sorbali, anmarga burba-dulad ukoed,  
     ibapaagine, gannar anmar-ogwisguoed.  
     Geb, anmar e-asabin deyob gudii gumaloed.
- 3 Anmar magar Bab-Jehová-dakmarsun,  
     e-Igarmar-Mamaidi anmar durdakmarsun.  
     Igi dad-ibeler-noedyobi, Bab-Dummad anmarse magar-guoed,  
     dii-wiedyobi anmarse nonikoed.  
     Igi gebe-dii-argwaned napa-nudakdae,  
     deyobi anmarse nonikoed."

### Bab-Dummad Israel-dulemar-abinsaded

- 4 Bab-Jehová sogded:  
     "Efraín-dulemar, ¿igi-an bemar-saergebe?  
     Judá-dulemar, ¿igi-an bemar-imakergebe?

- Ar bemar-an-sabed, mogir bolegoedba-ainakwialir-berguddaedyob  
guddaed,  
boo wakudaryalaba-ainakwialir-berguddaedyob guddabalid,  
deyobi, be-an-sabgued berguddaed.
- 5** A-ulale, an-gayaburba-barsogmaladbali, an bemar-wiosad.  
An-sunmakedgine an bemar-onaglik-imaksad.  
An-igar-naboged mar-aidegeyob bemar-oitononikoed.
- 6** Ibmar-uklemalad an abemaisulid,  
bur an-sabgued an bemar-abemaid.  
Ibmar-ogumakar-uklemalad an abemaisulid,  
unnila dulemar magar-an-dake-gumalad an abemaid.
- 7** Bemar Adán'yobi gumalad:  
Bemar, anbo-igar-mesisad bichismalad.  
Ar bemar, angi aibichamalad.
- 8** Galaad-neggwebur dulemar-ibmar-isgana-imakmalad-neggweburad.  
E-dule-ibmar-imakmaladi, bela ber ablis-eogedbi gudinanaed.
- 9** Dule-irwa-anse-gormaladi, Siquem-neggwebursik igar-nalemaidbali,  
emar-atursaega danagwen bin itos-bukwadamalad.  
Igi dule-ibmar-atursamalad, yogasaar ibmar-isgana-imakmala,  
deyobi, dule-irwa-anse-gormalad ibmar-isgana imakdamalad.
- 10** Israel-yala-naidgi, ibmar-gwen-nabirsulid an daksad:  
A-yalagine, Efraín-dulemar galagwensuli negsichigi-  
nanabukmalad,  
Israel-dulemar bela isgus bukmalad.
- 11** "Judá-dulemar, be-isgued-nukad,  
bemar sabsur-odurdakleged abdakdiid."
- Israel-dulemar Bab-Dummadgi dummad-isgusad**
- 7** **1** Bab-Jehová sogdebalid:  
"An-dulamar an na bendakbienad,  
an Israel-yar nudakbienad,  
degi-inigwele, Efraín-dulemar-isgued wilub-obichad,  
degi, Samaria-dulemar-isgued wilub-obichabalid.  
Ar ade, wemar gakangi gudimalad.  
Ar dule-atursaedyobi ibmar-atursaegala, negyaba dogmalad,  
gandikidgi danagwen galimbaba ibmar-atursaddamalad.
- 2** Ar we-dulemar, gwen binsadasurmalad,  
na e-ibmar-isgana-imakmalad angi gwen yoggumaisurye.  
Ar e-ibmar-isgana-imakmaladi, bela na egi e-ebiris naid.  
We-ibmar, bela an-asabin oyolenaid.
- 3** "E-ibmar-isgana-imakmaladgi, e-rey-yeer-itogega imakmalad.  
Degi, e-gakansamaladgi, e-dummagan-yeer-itogega imakmarbalid.

- 4 Bela we-dulemar, negsichigi abirgunagwarsuli yoledimaladid.  
     Ar we-dulemar madu-yoed-soo ginnitibisiyyob gumalad,  
     ar igi dule-madu-sobed bar soo-ogannoged abesurdae,  
     unnila madu-mued edarbesidae, deyobi we-dulemar gumalad.
- 5 Rey-ibagi, dummagan, vino'gi mumguddamalad.  
     Rey, galagwensuli guddamogad.  
     Deyobi, rey, dule-galagwensuli-mumgumalad e-aimarye na  
         sognagusdaed.
- 6 Urwed-onogega, e-gwage madu-yoed-diopisur-naddaedyob naddaed.  
     Mutikgusale, e-urwed geb boggusiid.  
     Neg-oibosale, e-urwed gannar egi noardaed.
- 7 We-dulemar, madu-yoed-soo-diopisulidyobi gumalad.  
     E-dummagan-negsemamaid-obeloddamalad.  
     Bela deyobi e-reymar-obelosdamalad.  
     Degite, wemar-wargwensaale, an-amiega gwen anse  
         gorpermalad.
- 8 "Efraín-dulemar neggwebur-baigan-angi-bengudimaldba  
     apuruded.  
     Ar an-dulamar, madu wagar-nailik-akwigusadyobi gumalad.
- 9 Dule-baigan Israel-dulemar-e-gangued ei obelonanaid,  
     degite, Israel-dulemar, deyob-neg-gunaid akusunna itomalad.  
     Bela e-ibe e-gargangued obelosmalad,  
         degite, amba aku itomalad.
- 10 Israel-dulemar e-isquedga gwen wile-itobisurmalad,  
     an e-Bab-Dummad-guedgi, gwen an-amibisurmalad.  
     Na e-san-dummarba-imaked geg anse-dagega e-imaked.
- 11 "Efraín-dulemar nuu-aku-neg-itogedyob gumalad,  
     gwen magar neg-itosurmalad.  
     Imbagwenale, Egipto-dulemarse bendakleged egisdeda,  
         imbagwenar, Asiria-dulemarse bendakleged egisdedabalid.
- 12 Ar deyob bendakleged-egisnadmalale, nuumar-galegeyobi an egi saki  
     obatoed.  
     E-isqued-ular, an ilagugle (7) sabsur odurdakoed.
- 13 ¡Duledar-wilesmarsun! Ar angi bangusmalad.  
     Angi gwisgusmaladba bergumarsunnoed.  
     Ar sunna an na bendakenad,  
         degi-inigwele, ar emardi unnila anga gakansaar sunmakmalad.
- 14 Anse innikigwadgi gorpermalad,  
     unnila, e-gasgi bomamaidamalad.  
     Ibmar-gwag-nikuegala, vino-binid-nikuegala, na dukin esgi san-  
         wionanaidamarbalid.  
     Degi, angi aibitedamarbalid.

15 Amba an-igargi an odurdaksad-inigwele,  
 amba an ega e-surgan-ogannosad-inigwele,  
 degite, amba angi-aibinega angi ichakwa-binsananaid.

16 Gwen anse Bab-Dummad-Bur-Biriginedse dagbisurmalad.  
 Warsi-biir-daklegedyob gumalad.

E-dummagan sabsur-sunmakmaladbali, es-suidgi oburgwilenai  
 gumaloed,  
 degine, Egipto-dulemar egi dodonanai gumarbaloed.”

### Bab-Dummadsurmaladse-gordimalad-ular, sabsur-odurdaklegoed

## 8

1 Bab-Jehová sogdebalid:

“¡Gar-trompeta be ogole!

Ar sulubagi anse-goled-neggi sigdanikid.

Ar Israel-dulemar, anbo-igar-mesisad obelosmalad,  
 an-Igar-Maidgi yolesmalad.

2 Emide, anse wiledanimalad. Weyob sogmalad:

‘Israel-Bab-Dummadye, be anmar-Bab-Dummadid, anmar wisye.’

3 Degi-inigwele, Israel-dulemar igar-nued obachamalad,  
 a-ulale, e-isdarmalad e-baleginmaloed.

4 An-sogedbarsuli reymar-omesdimalad.

Yogasaar dulemar-an-akudaked dummaganga nug-imakdimalad.

Na dukin san-wiomalaga e-manimargin, e-ormargin,  
 bab-dummadalyob-imaklemalad sobdimalad.

5 ¡Samaria-dulemar! Moli-bebe-nikad-sapingwagwad bab-dummadalyob  
 be sedimalad be metemala.

An bemargi an nue-urwed.

¿Ar sana bemar san-swilidiksuli-gudii gumaloe?

6 ¡Israel-dulemar! We-moli-bebe-nikad-sapingwagwad Bab-  
 Dummadkulid.

Ar wede, dule-sobedid.

Samaria-dulemar-e-moli-sobaled, an bela bibisgoed.

7 ”Ibmar-isgana be imaksamalad,

degisoggu, boni-dummad begi aibinnonikoed.

Trigo-e-war san sated, degisoggu, madubur nikuosulid.

Ar trigo-e-war wis e-san-nikunonikile, dule-bamalad-e-masga  
 guoed.

8 Israel-yar bela ibitosad,

emi-ibagi, dulemar-yar-baid-baidgi-bukwamalad-abargi bai  
 daklesulid.

9 Israel-dulemar aka Asiria-dulemarse bendakleged egichisgusmalad.

Moli-sapur-uayasuid-aku-neg-itogedyob angi bangudmalad.

Efraín-dulemar, igi-ome mani-amiega sui-bamaladbo mege,  
 deyobi gudmalad.

- 10 Efraín, bendaked-amiega, we-neggwebur-bamalad-manigi-bennus-inigwele,  
gwen ega igarga guosulid.  
Anse neggwebur-bamalad-dikasuli-bukwadse gales  
barmiledmaloed.
- Rey-buledsega, dummagansega  
sikwas sabsur-odurdakledii gumargweloa.
- 11 "Efraín-dulemar, na be-isgued-eliegala,  
bemar bab-dummadyob-imaklemaładga  
ibmar-ogumakar-ukleged-aila-bukidar sobsamalad.  
Ar wede, unnila isgued-ailaga be obinnismalad.
- 12 Ar sunna an bemarga igar-nuegan-narmakar bukidar uksaled,  
degi-inigwele, ar bemar an-igar gwen bai daksasurmalaed.
- 13 Be anga ibmar-ogumakar-uked yeer-itodamalad,  
be a-san gundamarbalid.  
Deki-inigwele, ulubgi-napiragwadgi-imaksulidba we-ibmar-imakleged,  
an gwen nabir daksulid.  
Degisoggu, bemar-isgued an iegosulid,  
an sabsur-bemar-odurdakedsemalad.  
Gannar bemar Egipto-yarse namaloed.
- 14 Israel-dulemar, ani an bemar-obinyedid,  
degite, bemar an-iedmalad.  
Nega-dummagan-yeerdaklemaład be sobdemalad.  
Judá-dulemar, neggwebur-galu-matusurmalaed omelodmalad.
- Deki-inigwele, bela bergumalaga, e-neggweburmargi, e-galu-matusurmalađgi,  
soo an odegooed."

### Israel-dulemar sabsur-odurdaklegoed

- 9** <sup>1</sup>Oseas, Israel-dulemarga sogded:  
"Israel-dulemar, mer be weligwar-itomar,  
mer be neggwebur-baiganyob iba-onomar.  
Ar bemar galagwensuli nanadmalad.  
Be-Bab-Dummadgi be bangudmalad,  
bab-dummad-baigan-nug be odummodmalad.  
Bela ibmar-gwag-omukuleged-neggi gambasaed-e-mani-bennukleged  
bur be abeged.
- <sup>2</sup> A-ulale, ibmar-gwagmar, uva'mar gwen be-oimmogosurmalaed.  
Vino-binid bar yeer-goblege guosulid.
- <sup>3</sup> Efraín-dulemar Bab-Jehová-yargi bar ambikuosurmalaed,  
gannar Egipto-yarse-namaloed.  
Asiria-yargi mas-isemalad gunmaloed.

- 4 Bab-Jehová'ga bar vino-eoleged ukosurmalad,  
     e-ibmar-Bab-Dummadga-ukmalad, bar ega ibnuedga guosulid.  
     Madu-gullegoedi dulemarga madu-dule-burgwaled-neggi-  
         gullegedyob ega guoed.  
         Dule a-madu-guchale, swilidiksuli guoed.  
     Unnila sikwas nabir-itogega ega guoed.  
     Degi-inigwele, we-madu, Bab-Jehová-negse seledosulid.
- 5 "Bab-Dummadga-iba-onolegedgi ,ibu-be imakmaloe?  
     Bab-Dummadga-itoakwaa iba-onolegedgi, ,ibu-be  
         imakmarbaloe?
- 6 Amba sabsur-odurdaklegedgi be wakinye sogmalale,  
     Egipto-dulemarse be galemaloed,  
     degi, Menfis-neggweburgi be-digmalooed.  
     Be-ibmar-nuegan-manigi-sobarmaladgi, dakemar ammurudoed,  
         be-dordonegmargi ikomar ammurudoed.
- 7 Sabsur-odurdakleged-iba noni,  
     buged-imakleged-iba noni.  
     Israel-dulemar, ,ibe wisigarmar!  
     Be-isgued dogdargasad,  
     isdar-emar-dakedi be baligannosad.  
     Emide bemar, Bab-Dummad-gayaburba-barsoged dule-gegegwaga  
         imakmalad.  
     Deginbali, nia-saedga be Dule-Bab-Dummad-burbaba-ibmar-soged  
         imakmalad.
- 8 Bab-Dummad-gayaburba-barsogedi, Bab-Dummadmala, Efraín-  
     neggweburga nakulegedga gumalad.  
     Wemar-yolemalagala, bemardi sakiyob e-idu galumar-  
         urbedamalad,  
     deginbali, Bab-Dummadse-goled-neggi bemardi wemar-sae-  
         dakdamarbalid.
- 9 Bemar Gabaa'gi-dulemar-gusmaladyobi,  
     nue bela-belad be isgudmalad.  
     Ar Bab-Dummadi, be-isgued iegosulid,  
         be-isguedba sabsur-bemar-odurdakoed."
- 10 Bab-Jehová sogded:  
     "An Israel-dulemar-aminonigu,  
         nega-dulesulidganba uva-san-amilegedyob an amisgusad.  
     An gebe e-dadgan-dakargua,  
         higuera-sapigli-e-san-dutuu-ainidanikiyob an daksad.  
     Degi-inigwele, emar aka bab-dummadyob-imakleged-Baal-Peor'ba  
         nanadmalad.  
     Abali na isgudmalad, dule-isguedga gudmalad.  
     We-bab-dummadbina sulibinsa-itode gudmalad.

- 11 Efraín-dulemar-e-ibmar-nuegan-bukidar-nikadi bar daklegosulid.  
 Nuu-gukudeyob guoed.  
 E-omegan bar gurgin-nika guosurmalad, bar mimmigan-nikuosulid.  
 E-dula bar sapibeneggi-mai guosulid.
- 12 Ar amba e-mimmigan-dungumamai-dakdemalale,  
 we-napneggi amba an ei obelogoed.  
 An egi bangudele, jdummad-wilemaloed!
- 13 Efraín-yala, Tiro-yalayob-dakleged.  
 Yala-nuedgi bukwamalad.  
 Degi-inigwele, Efraín-dulemardi burgwed-igarba na e-mimmigan-semamaid.”

### Oseas-Bab-Dummadse-goched

- 14 Oseas sogded:  
 “Bab-Jehová, ega be ibmar-ukbied ukdo.  
 Ega e-omegan mellegega be imake,  
 e-omegan-e-nunismar be odinnoge.”
- 15 Bab-Jehová sogded:  
 “Israel-dulemala, Gilgal-neggweburgi bela isguali gudmalad.  
 De-akale, an bemar isdar dakded.  
 Bemar-isgued-ulale, anse-goled-neggi an bemar-onioed.  
 Bar an bemar-sabguosulid,  
 ar ade, bela be-dummagan uayasulidamalad.
- 16 Efraín-dulemar galakuded:  
 Sapi-mali-dingudedyob nadmalad,  
 sapi-bar-sanmaksurmaladyob nadmalad.  
 Amba na mimmigan-nikudmalale, an ei oburgoed.”

### Oseas Israel-dulemarga sogded

- 17 Oseas Israel-dulemarga sogded:  
 “Ar bemar, an-Bab-Dummadba ibsassurmarsoggu, Bab-Dummad bemar-obanoed.  
 Neggwebur-baigan-abargi yarsuli be gudii gumaloed.”
- 10** 1 Oseas sogdebalid:  
 “Israel-dulemar uva-saila-yeer-sanmakedyob guenad,  
 ichesuli sanmakdaenad.  
 Ar bur bukidar-sanmakdedaed-inigwele,  
 aka bur bab-dummadyob-imaklemaladga bukidar ailamar sobdedamalad.  
 Ar e-yar nue-nasguddaead-inigwele,  
 aka bur bule e-bab-dummaganga ailamar yeerdakle imakdedamalad.

- 2 Ar we-dulemar darbo-binsadamlad,  
     agala, Bab-Dummad, e-isgumalad-ular sabsur odurdakoed.  
     Bab-Jehová e-bab-dummagan-ailamar bela obelogoed,  
     e-akwa-sobar-gwismalad bela ei obelobaloed.
- 3 "Ar sunna weyob sogmalad:  
     'Ar anmar Bab-Dummad-dobsuli-gudii gusye,  
         a-ulale, anmar reysuli gudimarye.  
     Ar anmar rey-nikana,  
         ¿ibugi wis anmar-bendakoena?"
- 4 Ar unnila binsa sunmakdamalad,  
     gakansaar ise-sogar ibmar-sogdamalad,  
     binsa dulemarbo igar-omesdamalad.  
     Agala, abin-abin-imakmalad,  
         gagan-isgana-ainiardaedyobi noardaed.
- 5 Samaria-dulemar, Bet-Avén-yargi moli-bebe-nikad-sapingwagwad-  
     orbiid-e-nug-odummodiidga bukib-binsanonimaloed.  
     E-dulemar, a-ulale, na wiles itononimaloed,  
     e-dule-irwa-ese-gormaladmoga bukib ega binsadarmarmogoed,  
         ar ade, e-ibe dikasuli yar-baidse sedmaloed.
- 6 Moli-bebe-nikad-sapingwagwad-orbiidi, Asiria-yarse rey-maniga-  
     guega seledoed.  
     Efraín-dulemar bingegumaloed.  
     Israel-dulemardina, na e-bab-dummadga-ibmar-imakdimaladgi  
         dummad-bingegunai guoed.
- 7 Samaria-dulemala, e-reybogwaobelolemaloed.  
     Diwar-noedba suarmar-selemaidaedyobi selemai gumaloed.
- 8 Bab-dummadyob-imaklemalad-e-negmar, yarmar-birigi-  
     bukwamaladi bela bibislegoed.  
     Israel-dulemar egi isgudidamaladid.  
     E-aila-matusurmomaladgi gagan-ikobimalad egi ammurnai gudoed.  
     Degisoggu, yarmarga sogdemaloed:  
         'Be anmargi batedage!'
- Yar-mulluganga sogdemaloed:  
     'Be anmar-omursunna!' "
- 9 Bab-Jehová Israel-dulemarga sogded:  
     'Beumar, Israel-dulemar! Gabaa'gi-neggusad-akale, be isgudanigumalad.  
     De-akale, bemar gwen isgued iesurmatala.  
     A-ulale, bemar be-isguedba Gabaa-yargi bila-onolegoedgi be  
         obelolemaloed.
- 10 An-itelegedba an bemar sabsur-odurdakoed.  
     Bemargi-yolemala galaga, neggwebur-baigan-atomalaga an imakoed.  
     Agi bemar sogbo-ibmar-isgana-imaksadba,  
         an sabsur-bemar-odurdakoed.

- 11** Efraín-dulemar moli-bebe-nikad-bipigwad-nuekwa-odurdaklegaledyobinad,  
ibmar-gwag-weed yeer-itodaenad.  
An ega yapa e-dukargi suar nasikgusanad.  
Emisgindi an, Efraín-dulemar-e-dukargi suar nasiksunnoed.  
Judá-dulemar napa-imuedga gudsunnoed,  
Jacob-wagan napa-imulesad-durwinai gudsunnoed.”
- 12** Oseas Israel-dulemarga sogded:  
“¡Bab-Jehová-amiega be guakwamalo!  
Ar bemar nainu-binidyob gumalad.  
Gwagegi igar-napiragwad be nasikmar,  
adi, egi sabgued-igar be amimaloed.  
Geb agine, Bab-Jehová, bemar-bendakegala,  
bemarbina danikoed.  
Ar igi dii-wiedi, napa-dinnaregedgi batenonidae,  
deyobi, Bab-Jehová bemar-bendaknonikoed.
- 13** Ar bemar, ibmar-isgana imaksamalad,  
agala, bemar boni-dummaganba galitonanaid,  
gakan-imaksadbali be ibitonanaid.  
Ar ade, bemar, be-moli-ur-bila-onomalandmargi bensulid nikusmalad,  
ar sorda-bila-onomalandgi be bensulid nikusmarbalid.
- 14** Emide, be-neggweburgine bila onoledoed,  
bela be-neg-gandikmalad bibichidoed.  
Igi Rey-Salmán bila-ononaidgi Bet-Arbel-neggwebur-obelosgusayob  
negguoed.  
Deunni, nangan na e-mimmiganbo sabsur-odurdaklegar burgwis  
nanaed.  
Deyob neg guoed.
- 15** Weyobi Betel-dulemar bemar-imakoed,  
ar bemar doggus-isgued wilub-obichaa nikad.  
Neg-oibononikile, Israel-e-rey yog-berguar guoed.”

### 2c. Bab-Dummad Israel-dulemar-sabesailad (11:1—14:9)

#### Bab-Dummad Israel-dulemar-wiledaked

- 11** 1 Bab-Jehová Israel-dulemarga sogded:  
“Bipigwaunni an be-sabgusad,  
Egipto-yar-akale an-machise an gochagusad.
- 2 An bur bule bese gornaigusdae-inigwele,  
aka bur bule be angi bangudda.
- Aka bur bule be bab-dummadyob-imaklemaladga ibmar-ogumakar  
ukdedaed.  
Bab-dummadyob-imaklemaladga ina-wawadikmalad be  
oburmakdeda.

- 3 Ani an Efraín-dulemar nanaedgi odurdaksad,  
     ani an argangi sealí gusad.  
     Ani an be-onudaked-gudiid-inigwele,  
         degit, gwen deyob be an-daksasulid.
- 4 Sabedgi an be-nisad,  
     wiledakedgi an be-sesad.  
     Mailediidgi an be-onosad,  
         wiledakedgi masgi an be-oguchad.
- 5 "Egipto-yarse be naosurmalad,  
     Asiria-dulemar bumar-dummadga guoed.  
     Ar ade, anse bumar dagbisur-gusmarsoggua,  
         a-nukad be deyob gumaloed.
- 6 Be-yargine bila-onoleged nagunonikoed,  
     be-isdarmalad bela be-yawagak-bargamalad bibisgemoed,  
         bela be-ibmar-imakoed-igar-mamaid obelolenonikoed.
- 7 Bumar, an-neggwebur-gumaladi, angi nue-banguega be  
     alamaknanaid.  
     Degisoggu, amba anse gorye sogmalale, bar an bendakosulid.
- 8 "Efraín-dulemar, ¿igi an be-iegosunna? Gege an be-ieged.  
     Israel-dulemar, ¿igi an dule-bamaladga be-urmakosunna? Gege an  
         be-urmaked.  
     Ar gege an Adma-neggwebur-urmaksadyob bumar-urmaked,  
         gege an Zeboim-neggwebur-iesayob bumar-ieged.  
     An-ulubgine, an-gwage bumar-sabedba bipirmaksiyyob itoleged,  
         bela an-samurmar bumar-sabedba nakwamaksiyyob itoleged.
- 9 Bar an begi urwosulid,  
     bar an Efraín-obelogosurbalid,  
         ar an dulemaryob gusulid.  
     Ar an Bab-Dummad-Isligwaled gued,  
         an-neggwebur-abargi an gudiid.
- 10 "An achumigur-nono-wawaadyob uurmakdoed,  
     geb bumar anba ibsdamaloed.  
     An binnasuli-uurmakdelle,  
         be-wagan, dad-nakwed-akale, dobed-abalagi anse nonimaloed.
- 11 "Egipto-yala-akale, nuu-emar-dobgudiyyobi, dobed-abalagi anse  
     nonimaloed.  
     Asiria-yala-akale, sikwi-emar-dobgudiyyobi, dobed-abalagi anse  
         nonimaloed.  
     Ani an e-negmargi-megmalaga imakoed.  
         Ani an Bab-Jehová-guedi we-ibmar soged."

### Israel-dulemar-e-isgued

Bab-Jehová sogded:

12 "Efraín-dulemar dummad-anga gakansadimalad.

    Israel-dulemar gusgu an-yardakdimalad.

    Judá-dulemar angi aibacha gudimalad,

    bemar, angine dikasur-yoggus gudimalad."

### Efraín-dulemar e-isgued-nukad ese ululesad

## 12

Bab-Jehová sogded:

1 "Efraín-dulemar unnila burwa-goledba gudidimalad,  
    dad-nakwedsik-burwa-goled-sorba gudidimalad.

    Aka bur bule emar-wionraigusdamalad,

    bane-bane gakanginbi gudimalad.

    Asiria-dulemarbo igar mesdidamalad,

    Egipto-dulemarga olivo-gwallu ukdidamarbalid."

2 Oseas weyob sogded:

    "Bab-Jehová, Judá-dulemargi yolenonikoed,

    Jacob, e-ichakwadaedba sabsur-odurdaklegoed,  
    e-ibmar-isgana-imaksadba sabsur-odurdaklegoed.

3 Jacob, gwaluleged-idiuale, bato

    sapibeneggi e-ia-yamosad.

    Degin, bato uka-selebagwadgi,

    Bab-Dummadbo gala-maada  
    nagusad.

4 Baliwituro bengusgusad,

    baliwiturgi obicha gusad.

    Jacob, ise-boale baliwiturga

    sognaigusad:

    'Wile be an-dakye.'

Ar Bab-Dummadi Betel-

    neeggweburgi Jacob-abingusad,  
    agine Jacob'bo sunmaksad.

5 Jacob, Bab-Dummad-Bela-

    Gangued-Nikadbo sunmaksad.

    A-Bab-Dummadi, Bab-Jehová'ye  
    nugad.

6 Israel-dulemar, ar bemandina,

    be-Bab-Dummadse be gannar

    dagergebed,

    sabgued be oyogerbebed,

    igar-napiragwad be imakergebed,

    Bab-Dummadgi-bensuli be

    nanaergebbalid."



Dule ibmar-wilubaedgi ibmar-wilubsanaid. (Oseas 12:7)

**7**Bab-Dummad Israel-dulemarga sogded:

“Bemar Canaán-dulemar-ibmar-ukmaladyobid.

Ar we-dulemar, gadi emar-yardakmalad,

yamo nibir-isganagi dulemarga ibmar-wilubsadamalad.

**8**Efraín-dulemar na san-bule-bule-sunmakmalad.

Weyob sogmalad: ‘Ibiyobi an ibmar-ibedga gusa,  
ibmar-bukidar an nikad.

Dule gwen angi isgued amiosulid,

deline, an-arbadiidgi dule gwen isgued amiosurbalid.’

**9**”Ar bemar Egipto-yargi-bukwamalad-akale, bato ani an bemar-Bab-Dummadid.

Gannar dordoneggi-megmalaga an bemar-imakoed.

Igi nega-dulesulidganba an bemar-imaksagusa,  
deyob an bemar-imakoed.

**10**Ani an anga-gayaburba-barsogmaladba an bemarga sunmaksad.

Wemar bukidar-negburgan-dakega an imaksad.

Wemarbali an burbar-sunmaklegedgi an sunmaksad.

**11**”Israel-dulemar-Galaad-yargi-gudimalad dule-isgumaladid.

Gilgal'ye-neg-nugadse naddamalad,

agi, moli-bebe-nikad oburgwedamalad,

adi, e-bab-dummadyob-imaklemaladga ogumakar ukegar.

Agala, e-aila-matusurmatalad bela an ei bibisgoed,

e-nainugi e-aila-akwamarbi-omileda an imakoed.”

**12**Oseas weyob sogded:

“Be-dad-Jacob, Aram-yarse wakite gusad,

agi ome-nikuega sibad-wawaad-edarbedgi arbas gusad.

**13**Bab-Jehová'di, Egipto-yargi Israel-dulemar-onogegala, degi, amar-akwebaligala,

dule-e-gayaburba-barsoged ebusgusad,

**14**Degi-inigwele, Efraín-dulemar e-Bab-Jehová-ourwega imaksamalad,  
Bab-Dummad-sae-itogega imaksamalad.

Agala, Bab-Jehová'di, wemar emar-ablis-eosmalad-nukad sabsur-odurdakoed.

E-isgumaladba na dukin odurdaklemaloed.”

### Bab-Dummad sabsur Israel-dulemar-odurdakoed

**13**

<sup>1</sup>Gebeunni, Efraín-dulemar, Israel-yargi nuga-nikarbamaladinad.

Ibmar-sogdemalale, dulemar, dobee itodamalad.

Emide, Efraín-dulemar, bab-dummad-Baal'ye-nugad-e-nug odummod gusmalad.

A-isgued-nukad, Efraín-dulemar burgwenoni gusad.

**2** Dugi-inigwele, amba bur bule isguedgi nanabukmalad.

Dulemar-ega-ibmar-sobmaladga sogdedamalad:

“Be anga bab-dummagan-imaklegoyob-manibiid be sobye.”

Geb a-dulemar na e-dakedba ega sobdamalad.

Dugi, bab-dummadyob-imaklemalad-e-wagar-uddamalad,  
degeine, dule-ogumakar-ukleged ega ukdedamarbalid.

**3** Agala, igi-bolegoe-boo-bate,

igi-boo wakudaryalaba-milege,

deyob gumaloed.

Igi-gagan-dinnagana burwaba-seleddae,

igi-waa soogi-ainakwider seleddae,

deyob gumaloed.

**4** Bab-Dummad Israel-dulemarga sogded:

“Israel-dulemar, Egipto-yargi be bukwamargua,  
bato an bemar-Bab-Dummadid.

An-imbagi Bab-Dummad-baid be nikuosurmalad,

an-imbagi Abonoged-baid be nikuosurbalid.

Unnila anbi be-Bab-Dummadga gued.

**5** Ar ani an nega-dulesulidganba, napa-uedikidba be gudigu be-akwisad.

**6** An bemarga masgunned uksagusad,

agi bemar nue-immeles gusmalad.

Dugi-inigwele, ar bemardi san-dummarbaa itosgusmalad,  
degidbali, be an-ies gusmalad.

**7** Degisoggu, an bemarga achumigur-nono-wawaadyob gumaloed.

An bemar-idu achu-sapur-barbadyob dukumaloed.

**8** Igi wiob-ome ei mimmigan-sulesale, uluardae,

deyobi an bemargi gwichigudoed.

Be-gwage-dubmar-mamaid an bei itiroed.

Achumigur-nono-wawaadyobi an bemar-obelogoed.

Ibdurgan-ursilimaladyob an bemar-ichimakoed.

**9** ”Israel-dulemar, ani an bemar-obelogoed,

ar bemar, be-bendakdiidgi be gwisgunanaid.

**10** Ar bemar gordigusmalad: ‘Anga be rey-udeye,

dule-negsemalad be anga udabarye.’

Degite, bemar-neggwebur-bendakega, ¿bia be-reymarde?

¿Bia dulemar-bega-negsemaladde?

**11** An-urwedgi an bemarga rey-uksad,

an-urwedgi an bemar-annik susbalid.

**12** Efraín-dulemar-e-ibmar-isgana-imakmaladi nue-narmakar maid,

bela an e-isgumalad semaid.

**13** Israel-dulemarga gwaluleged-ibagan nonikinad,

degi-inigwele, igi sikwi muu-neggi aidegega geg nuekwaa mege,

deyobi be binsaedsuli gusmalad.

14 ”¿Degite, amba neg-uan-e-ganguedgi bemark-bendakbi be an-abede?  
 ¿Burgwedgi an bemark-bendakode?  
 Burgwed, ¿bia be-boni-dummadgande nadsunna?  
 Neg-uan, ¿bia be-dule-obeloged nadsunna?  
 Burgwed, neg-uan, be dagmar,  
 wile bar an wemar-dakosulid.

15 ”Ar bemark, Efraín-dulemar, be-gwenadgan-abargi be nasgudele,  
 ani an bemark-obelogoed.  
 Igi-burwa-dad-nakwedsikid nega-dulesulidgansik-goledi, dianmaid,  
 degi, diwarmaid dinnaa imake,  
 deyobi an bemark-imakoed.  
 Geb agi, be-isdarmalad be-ibe  
 bela be-ibmar-nuegan sumaloed.  
 16 Samaria-dulemar, e-isgusad-nukad, an sabsur-odurdakoed,  
 ar e-Bab-Dummadgi yolesmalad.  
 E-dulemar bila-onogedgi burgwemaloed,  
 e-mimmigan napagi sabsur-omukulenai gumaloed.  
 E-omegan-gurgin-nikamalad-ibe,  
 saban sabsur-egalenai guoed.”

### Isguedga-wile-itogedba bendaklegoed

- 14** 1 Oseas Israel-dulemarga weyob sogded:  
 “Israel-dulemar, be-Bab-Dummad-Jehová’se be gannar  
 dagmar.  
 Ar bemark na be-isguedgi-argwanega na be imaksamalad.  
 2 Bab-Dummadga be ibmar-sogmaloed, nue egi be binsamalo.  
 Bab-Jehová’se gannar be namar,  
 ega be ise-wilesakwaa weyob be sogmaloed:  
 ‘Be anmarga isgued elie,  
 begi-isgussulidyob be anmar-dake.  
 Wiledakedgi be anmar-abingae,  
 ar anmar na be-nug odummobimalad.  
 3 Bab-Jehová’ye, Asiria-dulemar gwen anmar-bendakosulid,  
 bar anmar molimar-bila-onoged-birgi nakosulid.  
 Anmar, anmar-ibmar-sobsamaladse anmar-bab-dummaganye, bar  
 golosulid.  
 Bab-Jehová, unnila begine babgan-satemalad wile daklesiid.’ ”

### Bab-Dummad Israel-dulemarga ibmar-sogsad

- 4 Bab-Dummad Israel-dulemarga weyob sogded:  
 “Ani an bemark-isgued nudakoed,  
 wile-be-dakedba an be-sabgumaloed,  
 ar ade, bar an bemarse urwosulid.

5 Boo-milegedyob an Israel-dulemarga guoed.

Dutu-achunnedyob an Israel-dulemar-imakoed.

Igi Líbano-urwamar-e-sailamar neg-urba-diglegwichi,  
deyobi, an bemar-imakmaloed.

6 E-anagan nasgudoed,

olivo-sapi-gandikidba-yeerdaklegwichiyob bemar guoed.

E-yapannedi, Líbano-urwar-yeer-yapannedyob yapanmaloed.

7 An-argan-yaurgi gannar ambikunonimaloed,

orosgi-dakleged-trigo'yob dungudmaloed.

Uva-dub-ainiedyob e-wagan ainidoed,

Líbano-yar-e-vino'yobi, nug-dummarbaa gumaloed.

8 Efraín-dulemar, Bab-dummadyob-imaklemalad be iemarsun.

Ani an bemar-abinsadiidid,

ani an bemar-edarbediidid.

Baryawararamakgwichiyob an gued,

be-sanmakedi angi danikid."

9 Ar dule, binsaed-ibedile, we-ibmarmar magar itogoed.

Ar dule, nue-ibmar-wisile, we-ibmarmar magar itogoed.

Bab-Jehová-igarmala bela innikigwadbiid.

A-igarbali, dule-innikimalad nanamalad.

Dule-uayasulidamaladdi, we-igargi yoleddamalad.